

忠雅堂文集

忠雅堂文集卷十八

詩十八

鉛山 蔣士銓 心餘

悼雙槐樹六首

講堂西南隅兩槐立如耦三年天鏡樓愛此雙老友陰籠梳妝
臺綠亞讀書牖獵花曉蜂喧抱葉夜蟬守檐戶托靜深人意亦
渾厚不問栽植年喬柯自然壽

六月日丙寅主人瘡在牀怪風卷江來萬籟聲怒張轟然若山
顛几榻奔炎光僮婢譁中庭絕叫雙龍僵壞垣毀屋瓦偃仆猶
軒昂力疾起視之吾心惄然傷

旣無鉏耰觸亦非螻蟻穿本根未枯朽枝葉猶鬱然于人等暴
死命盡誰能全無知物已矣有情吾慨焉帷蓋不可施掩蔽無
泉淵招魂化青虬銜尾翔旻天

方栽冊修篁頓失兩喬木
譬營一畝官卻燬萬間屋
雜花奪倚恃冬青感孤獨
況我中年情哀樂恒易觸
始知攀條者流涕皆有屬

種山堂堂來居然入我戶
可憐失障蔽窺瞰到行路
雖然增空闊未免撤防護
炎曦侵牀帷飛雨灑巾屨
如家喪長者一一等孤露
樹木須十年繼此憂遲算
樹人則如何根荄奚以固
斜月共我寢我夢迷南柯
本非求達人所失原不多
兩槐種植歲知我爲誰何
茲忽遭摧折難謝旁人訶
德薄應譴罰殃及殊偏頗
槐非不材木假塞山之阿
自非厭冰霜怪風焉能劇
大椿歲八千壽終遜山河
槐分爾有靈一咲彭殤過

江西新昌典史諸公死事詩

雲南反江西亂軍民逃官吏竄會稽人諸士英揚尉新昌有妻

傳有母王有三子一女有僕諸福臧獲良母年八十兒年四十
九孤城如斗兒獨守力盡被賊縛罵賊不絕口啖以冠帶怖以
刃妻子悲嘯一何有賊曰降不降公曰殺便殺垂挺交下血肉
飛凜乎臣節不可拔臨刑口占二十字就義從容持定志明日
毋卒列兩櫓贈秩主簿遣官祭妻子飢寒留異地三年求乞骨
始歸忠臣官小傷如是嗚呼幼慕文山號文水終與天祥同一
死咄嗟何人典史耳典史死事懼失實太史之書存特筆康熙
甲寅年仲冬廿一日

酷暑

陸渾蒼莽報新焚齷齪桃笙宿燼熏烈日全收流電火炎風不
卷礮車雲盤堆淩薄攢冰柱沼亂魚鼉練水軍十萬蒲葵不堪
用湘簾空展碧波紋

會稽孝女金玉堂詩

南斗注生北斗注死東嶽之神奉行耳代親死者誰能任十六
女兒身姓金八姑名玉堂讀書服勞習術鍼母夢鬼伯語數月
壽當盡兄夢亦如之女曰我其代母殞南斗北斗橫斜于天鹿
脯香醅乞延母年自臘徂春禱益堅拜問東嶽然不然神不語
以馘許女咲持馘歸向空招二豎病來矣八姑卧越五夕八姑
坐浴蘭湯開履箱易衣戰飾珮璫屬生者勿我傷善事親母命
長星月光梅檀香金八姑卒于牀乾隆戊子四月初二日會稽
述者皆能詳咄嗟東嶽神乃迎孝女去海山縹緲仙人居孝女
之居在何處在天在地不可知我及見聞當作詩

公讌卽事二首

鼓角轅門肅夜營華堂絲竹譜新聲燭羊帳外多牙將行酒樽

前半騎兵一丈紅毬花對舞兩行銀燭月爭明停杯忽看傷懷
事猶有當歌淚點橫

留髡一石主賓諧那要臣冠挂玉釵醉墨似雅翻雪壁角聲如
虎靜銅街頭廳客騎穿花散歸路衙官列炬排宴罷山樓足高
臥一燈還照讀書齋

畫兔

長須缺口衣褐公何年竊藥辭月中偷閒踞此一拳石趺居八
竅栖花叢丁丁肅肅托吟咏野人可寄干城戎管城奈無食肉
相脫穎算佐蒙恬功老茲槃礪遁宜網頽唐自號長生翁我欲
叩君廣寒事授職可與金烏同蝦蟇屢蝕爾無恙怪詩可否然
盧仝中山支庶孰爲盛三窟老姦誰最雄全生何尚畏鷹犬卜
兆意許隨熊羆語焉不詳吾弗許問而不畚爾豈龔毛生失咲

罵穿鑿咄咄見逼予其窮明月在天我入晝是色是相皆空空

吳山觀禱雨

陽氣蹶張陰氣弱雨勢每爲風力奪斷雲拖墨堆雨頭斜日飾
金散風腳屛痕全出屋宇高河底難藏鼃鼃踏萬條龍骨旱田
翻千尺銀餅枯蟄閣杭人拜呼觀自在天竺蓮幢下城郭雷車
脫輻失雙輪龍井沈珠收一勺吳山下視匣明鏡百頃西湖變
溝壑前人蓄洩講水利白老蘇公皆不作穀價高騰酒價賤樂
歲凶年兩難度三老賣船買簋筭川路休愁波浪惡江湖怒氣
一時平羅刹潛踪防戲謔天心冥冥任憇尤佛力巍巍爽期約
安能坐挺筆千鈞上挾銀河九天落

菜竹亭晚眺二首

短短柴扉窄窄河浣衣門巷算砧多一弓橋卧龜魚水時有行

人倒影過

昌安門外水田鄉漁艇葭舟度女牆指說東頭盡處海天無
際白茫茫

風雨

五日風十日雨秀色油油上禾黍五日雨十日風八分九分談
年豐懶龍睡足不復臥挾水行天求補過汲井利用溝澮盈河
橋漸有搖舫聲新涼一雨洗百病寒衣有無且聽命驅熱還須
北風勁

題鄭板橋畫蘭送陳望亭太守

板橋作字如寫蘭波磔奇古形翩翩板橋寫蘭如作字秀葉疎
花見姿致下筆別自成一家書畫不願常人誇顏唐偃仰各有
態常人盡咲板橋怪花十一朵葉卅枝寫于何年我不知叢蘭

荆棘忽相傍作詩題畫長言之板橋當初弄煙墨似感人情多
反則舉以贈君心地直花葉中間有消息君生蘭渚旁熟精種
藝方葉雖欹斜具勁力花卻靜好含幽香君今一麾仍出守長
挹清芬懷舊友板橋不作花不言題送君行當折柳

九月初六日書慰鍾介伯秀才二首

秋鐙再照讀書身不是今年蕊榜人天意難知猶及待士才如
此豈長貧三冬足用時非算萬谷重開蓬有神科第從來要宜
稱未容懼喜未容嘆

開達初階借出身三年取次笑寒人幾纔五十寧稱老子有文
章未是貧少賤光陰同拱壁芳時榮落聽花神商量傳學平憂
患底用隨他作怨嘆

喜錢慈伯得舉三首

八斗才華萬斛愁庾公蕭瑟朱牆秋憐渠歸妹愆期久喜到今年說上頭

京闈記我列星文注徧題名不見君豈料還鄉七年後挽弓來壓射潮軍

風吹姓字過江來累我全家咲口開還就燈花一占卜明年佳兆動春雷

高生詩

甫冠開萬卷智慧兼羣倫誰將白玉山琢彼九尺身默然儔伍中見者驚嶙峋與之娓娓談古事森螺紋八十有一家瞭然知僞真忽焉出尚論特識傾前民江海納方寸空潭瀉陽春何來美少年高生挺松筠始我識高生墨纓度循循孰贊不置口品冠袁公放賓小祥若初喪啜粥除羶葷先公古循吏學道醇乎

醇仕宦二十年不救書生貧廉潔夫如何棺衾莫能陳凡其所
歷地哭聲轉相聞高生性貞介志節如其親但有屋一區寂莫
湖州濱生昔未冠日咲采青青芹抱經治官書吏事習已勤居
然參幕僚政事文章勻偉哉錢侍郎維城拔之貢成均越材豈不
多惟此勝郢斤我買江上船生來拜船脣一鎰照兩榻水窗坐
溫溫屈指除服時碧霄行麒麟別去再改歲積慄無由申每懷
君子友皎月栖梁塵秋榜忽報罷令我心如焚文行既粹美托
處復遭屯乙科乃至難理數何緣因窮達爾豈知冥冥若有云
敢以寸光目上疑天地仁高生名文照東井別字新厥考諱曰
植世爲武康人我無春風力吹之上青雲但作高生詩歎惋席
上珍

再別鼓山

言歸秣陵宅復買錢唐舟山中故人酒盡裏讀書樓風雨三秋
別煙雲半載留明年尋後約一咲減離憂

渡錢唐江

雪氣兼天湧潮聲到海還孤帆橫翦處兩越畫圖閒人語過江
別秋雲終日閒杭州展屏幃湖上好青山

塘栖道中

百里桑陰密都無雜樹連春禽留戴勝蠶利重吳棉淩薄朝開
市魚蝦螟聚船收帆依水宿還聽說豐年

嘉興

不容山到郡但放水還鄉赤腳多田婦邨沽滿市航入吳收夜
雨於越盡嚴疆欲捧先生袂太傅錢公金陀認古坊

平望野眺

三萬六千頃太湖藏此中
逋逃諸藪接防禦列州同
地迴波瀾闊時清盜賊窮
當秋弄漁籟誰是鐵厓翁

寶帶橋夜泊

五十三輪月清光一半弦
橫空連斷脈卧影劃長天
暮雨吳歌接秋鐙估客眠
推篷看虹彩明鏡水中圓

過梁溪

墩聚陶人宅黃婆自昔稱
地分雙縣古龍抱一珠澄
酒借名泉釀山從別墅登
遣秋宜小醉前路指毘陵

五君詠五首

咲脫中丞署重依水竹居
客來參古佛老去愛吾廬
增影仍窺案藜鐙自照書
小西湖上坐風味近何如

蘇肅

夢繞菊花邊先生別二年
情深詩卷外心到酒杯前
與俗都無

累尋懼獨有權六朝山水窟誰復古幽偏

簡齋

屢散萬黃金霜痕鬢欲侵用才官不稱當局事都任書養畸人

氣詩傳孝子心青山銜土後不敢聽哀禽

再求

帳下教歌舞尊前贈鐸邪殺人年少膽游俠魯朱家歛氣論諸

史多情咏狎邪醉來揮健筆一咲染袍花

柳林

老屋秦淮上諸生擁一翁談經常破的把酒亦雕蟲薄俗存交

義深衣見古風知音有賢耦垂白愛梁鴻

恬來

坐深

風與歸人逆舟同逝水爭坐深移斗柄眠短厭雞鳴眼纈因書

暗心兵得酒橫秋來多肺疾何處學長生

逢客

戶牖玲瓏接江船似曲房岸喧兒廢讀人默鼠窺糧米價朝開

市農功晚滌場年豐吳越共逢客問吾鄉

盡室

酒渴除風幔曾縣讓客舟驟寒雅徙樹久雨葉知秋白鷺團煙
渚丹楓轉寺樓有生皆自得盡室苦沈浮

江近

岸束知江近崖高覺水乾有秋倉廩實于野稻場寬漕舶歸衙
尾牙兵咲倚鞍邨邨打新穀旅食爲加餐

寒谿

路人呂蒙城寒谿淦淦清雞豚依水檻砧杵識柴荆雅軋輪孤
轉嵯峨嶺對橫風傳林壑響隱挾大江鳴

野望

蒼蒼橫翠微片片白雲飛古磻自流水幽人猶未歸荷鋤茅屋

轉啟戶綠陰園欲覓采芝路西巖舍文耶

立冬

試威霜力重秋盡覺寒深生理三時過元冥一旦臨夜嚴江氣肅天迴漏聲沈節候爭斯刻羈人畏鐵衾

沽酒

夾岸酒家胡新醕喚客酤苦疑三月露甜膩百花膚醉醒消寒日江山媚老夫銜杯看鐵鑿談笑論東吳

物情

葉亂驚鴻去沙崩宿鷺稀物情多避俗客意本忘機嫩菊低漁槩疎花上酒旗江邨好門巷各各晒寒衣

豁眼

豁眼大江來寒波萬頃開岸移京口樹塔倚妙高臺古事駸駸

過潮聲故故迴魚龍方穩卧敢蹴海中雷

泊京口有懷林親家病體三首

病劇休官後身存失怙餘斷腸因汝繫垂死寄吾書縱縱眠苦
塊哀哀戀聖廬勝喪古人重毀瘠意何如
遠耗何由確相思只自疑頻傳婚嫁信共詠薦蘿詩孟氏妝宜
古班姑訓可資前賢率犬意未許俗人知
計日三旬阻先期百兩迎雙星方脈脈一水尚盈盈娶婦非常
喜稱翁卻自驚不知扶病者能否掌珠擎

懶慢四首

治生原懶慢泛宅亦尋常志豈存溫飽謀偏逐稻粱家人三世
托書籍萬金裘但覓延齡酒爲親和老方
照溪雙鷺影白到頂邊絲鳥且憐身瘦雅方托母慈渡江仍用

楫投老是何時盡日攤書史生涯亦苦疲

水土非殊俗山川失故鄉近多關爾疾頻翦藥苗嘗敢作憂生
語難求暖老方恩恩百年半勦業漸相忘

四十四年過爲歡竟若何二毛須髮見百感酒杯和屢病吾衰
甚方冬物變多無田歸不得今歲又蹉跎

說詩一首示翰泉

唐風列四始崇儉習苦詞瞿瞿美良士足配岐剛詩六代唐宋
閒作者森然垂國朝多學人風雅亦未稀雁門列三馮于古
皆庶幾崢嶸陳澤州南人敢盱眙性情出本真風格除脂韋雖
非三百篇老蒼具威儀北方有學者未能或先之同時王新城
俗士羣相推聲色豈不佳但襲毛與皮秋谷撰談龍嫚罵頗有
宜及觀餘山集邊幅亦可嗤鼯鼠入牛角束縛泯設施空浮與

嶺迫其失堪等夷李杜韓蘇黃芥子藏須彌舒卷成波瀾比興
無支離人亡其詩存生氣何淋漓豈如優孟容摹仿攀人籬餘
子各自矜淺俗或難醫依艸附木閒標榜徒爾爲後世五百年
識者無所私疾風卷敗葉知己難盡期子年未及冠患難身轉
移隨我名山中勵志栖經帷餘事學韻語才力足起衰百千萬
里程進止爾自持勤成怕則廢汝畫由汝欺秋水與說巖丈夫
彼爲誰此言苟三復後來其汝師

江泛二首

二百里江光羣山繞建康滔滔隨眼白蕩蕩接天黃戰骨都沈
海蘆花又戴霜英雄先後外雋物是孫郎

匙滑管城飯廚香試鱖鱖曉煙浮海氣夕網結冬晴雲合三山
遠帆過一鳥輕東來建業水纔下石頭城

懷彭六一宮允二首

我憶彭中允雙旌拂洞庭七年荆楚國兩度使臣星正氣尊衡
嶽奇才貢漢廷文辭是餘事底用問湘靈

言過湖北路喜動舊門生公子官加美中丞吏再迎但推文爛
漫誰識志崢嶸十載同年友孤懷爲爾傾

懷李戴庵明府二首

栖栖李孝子諤諤古端人去作閩中令難迎塞上親一官身涕
淚萬里母昏晨回首家鄉路音書總未真

南北一征鞍當年省視難無官能獨往有祿共誰餐稟性今人
鬼資忠異日看天憐清白吏間并賀平安

懷家兄禹立

屢易橫經地耕傳失火書一衿寒徹骨五十命何如生事難相

蘇軾詩集卷十九
聯繁憂客未除深慙脊令義垂涕想門閭

燕子磯

苔蘚千年碧槎牙積鐵屯何年傍朱雀不解啄王孫花落銜泥
壘春銷掠水痕空江橫鰓鬣此是亂雲根

遙青

忽見最高峰如瞻故舊容心懸白門柳耳過攝山鐘寺古吾曾
到江寬不可從遙青看未厭算被莽雲封

到家二首

庭階寂寂州新鉏去日紅梅賸半株憔悴似傷思婦老蕭條真
類道人孤驚龍吠主當門臥衰僕疑賓倚杖呼十擔歸裝兩年
別不應風景便差殊

萬卷深藏十笏樓漏痕蛛網閱春秋丹黃蝕處參差補鐵軸殘

多番量修傳與兒孫能幾世誰家田舍得終留絳雲天乙分存
沒試問三龜肯肯不

種兩梅樹

昔名紅雪樓因梅舒絳牕梅今勝枯椿不復有枝葉禿如閉院
僧衰北退老妾無人滌蠹蝨有鬼弔蜂虻歸遲失所依緣在可
重接乃迎兩傾城並徙雙步屨一披淺碧衣一暈燕支頰迴眸
古仙人左右欲提挾春風何時來卻此扇影擱老樹忽著花心
喜同見獵鼎足羹共調魚貫龍兼攝專房主三閭舞羽唱三疊
備物密豈亡胥命蒲自協堂戶三星交火澤二女浹故人益壽
康新人各安帖小樓當易名長笛敢輕塵

曉起懷戢山

曉起寒鑪不可熏凍雅凌亂瓦波紋花移小院如遷客雪滿山

中欲化雲人愛樓居天鏡遠家隨斗轉地圖分碧闌干底鳥銓
鵬傾耳霜橋總未聞

種蠟梅

黃梅道家妝散仙乃其儕心厭古人知負性如乖厓我家三梅
樹庭左肩隨借紅者新舊花綠者參差偃庭右一木犀金粟殊
苞胎雖亞兩海棠絳濯難趨陪敬迓檀心師耦居求無猜三姝
如主人肅客迎東階客入門而右拱揖東西排艸衣冠黃冠不
羈放形骸取道冰雪中元冥敢相摧

舊集

江海歸來共命禽舊集惻息理寒衾劇于少日和愁斷情到中
年此病深半臂難忘湯餅事殘羹新毀白頭吟平生繼絕鏗前
語窗外梅花識此心

省識

昨日笙歌御彩輪
簾櫳便有十分春
堂前敢報合飴德
膝下初來歛衽人
事親同收新婦聘
羹湯先向祖姑陳
從今省識尊嫜字
慚愧當時敬養身

生日

增長年華又此期
鬢霜添上兩三絲
驚秋體弱同妻瘦
啜菽家貧累母慈
孝子常遵稱老戒
新孃學捧介眉卮
壽觴代送重闈喜
要引安人一解頤

內子生日

禮佛看焚壽字香
珩璜雙引玉鏘鏘
箱中命服經年舊
鏡裏朱顏逐歲黃
新婦爲婆傳井臼
人家偕老重糟糠
明冬對飲生孫酒
調笑應添小鳳凰

悼良姑慰簡齋前輩時簡齋病齒未愈

齒脫骨肉離占夢爲不祥袁公病齟齬忽痛嬌女殤我母攜我
婦昨登園中堂夫人太夫人歡喜相迎將嬌女名良姑紫鳳蟠
衣裳辮髮不冠櫛肌膚凝雪霜瞳人秋水波口輔新月光五齡
解諷誦言動罔不臧白鑒與韓羣庶幾鴻雁行見客遲長揖嘯
聲鳴鳳皇慰懷勝男兒預卜門楣強見者爭抱持何況耶與娘
我母歸語兒閨妹同面龐我婦悽然言阿寧還頤頤我聞叩齒
祝此語勿再詳敢將墓門艸止並瑤池芳三日緘封來詩題哭
阿良舉家變色起我誦詩琅琅始簡尚成句繼誦吾本儒魚骨
慙我喉痰藜刺我腸我家齊聲哭鄰人駭奔踰我出言因由泣
者咲者相咲者譏過情泣者觸悽愴客散我入室睡夢猶徬徨
我妻嚶而號阿寧戲身旁我母起敲火阿閨來扶牀又言到隨

關往慰媳與婢種種成緣因今夕何獨長遙知哭女聲欲撼倉
山蒼袁公作達人愛河不可杭勸喻總陳言緘默懼其傷退之
告東野強詞頗荒唐慨作梟虍觀天性毋乃戕山谷書此詩君
美情豈忘失女等失子誰得分瓦璋所幸母孥安覆覆幽蘭香
明年試曉韓共飲湯餅湯兒貌類女子良也眞子房紛紛前後
身轉輪難測量吉夢齒復生編貝如東方

龔侯刀劍歌

一條電光三尺水出入沙場萬夫死人頭過處古血腥馬腳飛
時陣雲紫太平世界善刀藏龔侯含咲游咸陽新豐市中酒氣
熱醉買壁上蛟龍偃寶刀得主聽主使百鍊之剛能繞指別有
一劍紅毛來魂魄隨鋒泣倭鬼誰聞蛇母秋郊哭魑魅潛藏狐
鼠伏功名可入刺客傳姓字應留陶氏錄龔侯任俠無荆高右

手執劒左手刀鐙昏月暗一起舞白練四湧翻銀濤奇氣凜凜
出兩臂亂掣冰山轉天地冥冥莽莽透骨寒雪卷虛堂騁風勢
吁嗟乎報恩報讎孰淺深爲銛爲鈍隨銷沈干將補履刀作鏡
老盡人間壯士心龔侯當官有官職持此爲時誅盜賊不然佩
牛佩犢學爾渤海翁摩頸休如屈突通

西園六朝松石歌同高東井作

種松疊石無人見松賸雙株石數片六朝法物但傳聞百畝西
園已更變托根城市偶得全齊梁歲月想當然後彫免共薪雅
伐不歎欣隨樹曲拳雷霆難起兩龍蟄一翁一孫相對立全收
花葉入精神盡斂皮膚作筋力雨露冰霜總不知斧斤烽火還
見遺久忘南國兵戈事那記中山歌舞時松石相依孰前後石
不能言松自壽萬蟄獸來敢竊窺六丁移去憑偷售松根入石

石骨強石上苔花松子香身堅不錮南山蕞爾古曾驕異姓王
一拳戴字書痕古留守司題馬光祖南宋園亭屬那家前朝第
宅更新主老松怪石何地無難得留遺在大都輪囷終逐桑田
爛琥珀當隨海水枯江山勝處多陳迹松石同吾誰主客九老
栖霞本是松一片韓陵並無石

過百子山樵舊宅二首

一畝荒園半畝池居人猶唱阮家詞君臣優孟麒麟楨毛羽文
章孔雀姿復社空存防亂策灰難禁再然時城隅指點烏衣
巷只有南朝燕子知

中興歌舞荒淫日羣小風雲際會年樂器誰焚亡國主詞臣分
勞衍波箋名高十客平章重網盡諸人黨禍連一樣蓬蒿埋舊
宅白頭江令較他賢

題隨園雅集圖

雲壑風泉共此心
況于城市得山林
畫來恰喜生同世
傳去遙知後視今
老輩須眉隨樹古
先生情意比秋深
就中悟徹忘筌旨
還似昭文不鼓琴

土牛

旱潦占頭角
豐凶驗尾躡
游春雜冠蓋
過市謝鉏耜
管領三農穀
胚胎一斗泥
鞭聲雷響處
犢子任分攜

句芒

列職牽牛宿
栖神太歲宮
衣冠嫌附會
履屐厭雷同
名姬賢司牧
人呼拗相公
東皇老孫子
含笑願年豐

門神

倚傍誰何宅
張施爾許形
尊疑封戶牖
貴比列丹青
面目隨年

收精魂入夜靈穿窬豈公懼聊托壯門庭

鎮魑

科名前進士狀貌故將軍至性偏憐妹孤臣敢怨君腹空能納
鬼心外不言文誰托終南侶多年捷徑分

花錢

郇公雲五色飛傍孔方家舞共青幡出飄同綵燕斜門楣增氣
象蓬華借光華難買東風性終防等落花

桃符

度索仙人販丹砂道士書崢嶸禦魑魅寂寞倚門間入土言當
省祛邪事有諸堪憐退歸者新舊較何如

春聯

製仿宜春帖排門吉語多豐年資頌禱民氣驗康和札闥言真

妄蹲鴟字每訛書傭橫雪案僵手凍頻呵

歲鼓

餞臘迎春際隆隆起蟄雷年光渾擊破花信湯催開響逐寒威
去聲疑雨點來兒童能散打同唱賣癡獸

爆竹

礮力憑金石憐渠具體微驚雷一絲引故紙萬層飛身碎因狂
藥心長有禍機不知誰掩耳還咲盜鈴非

照耗

地湧光明藏虛危敢竊憑難藏五窮鬼莫避九枝鐙幽谷陽和
轉空倉雀鼠憎牀頭看撲滿如願咲相磨

鏡聽

匿影循牆走尋聲倚壁聽何期深夜語卻是十分靈識緯原難

測推求恐不經
菱花常自鑑
何必問冥冥

忠雅堂文集卷十八

忠雅堂文集卷十九

詩十九

鉛山 蔣士銓 心餘

鍾介伯秀才招游禹陵南鎮泛舟溯若耶谿樵風溼而
返壘用岐亭韻二首

以下疊岐亭韻共十二首例叶三首 已丑

油雲釀輕陰屢沛霜雪汁百五寒食過花信風猶濕尋芳具扁
舟容與客相得波平岸轉遲酒渴杯行急上弔濠烏篷銜尾亂
羣鳴歌舫玉釵橫食櫺青帛冪突兀來飛甍禹廟綠垣赤門迎
衡岳碑墨鏤篆文白黻冕秉元圭神從分閭幘可憐無祠官不
免若教泣俎豆今尙陳封鬣古已缺惟餘千萬蝠糞污點游客
塗山昔如何邈矣諸侯集

崇阿抱南鎮路溢椒漿汁夕陽唱神絃煙裊鑪峯濕掌夢列衙
官祀典豈云得莞然不可留迴棹轉波急言尋若耶谿浣女雜

鴈鴨登橋望仙人鶴駕春雲羃三五團瓢家花樹羅翠赤老僧
說豐年遙指射的白喫茶腋生風樵風倒吹幘咲看墮閒人醉
飽發歌泣清游興將盡落日挂山缺羽觴無停飛不知何者客
秉燭敬城扉鐙火市樓集

挽任處泉

應烈

前輩三首

半年身作遽衰翁示疾維摩臉退紅百事都隨婚嫁畢一樓真
對水雲空歸田樂故由官美受福人難得考終不道扶牀成永
別兩行清淚落哀鴻

不住杭州住越州寓公居在鑑湖頭門高士盡師元禮道廣人
爭識太邱一郡江山屏上畫十年絲竹鏡中游青冥忽報神仙
死萬壑千岩黯對愁

自營繭室喜初完快開飄然墜玉棺逝者精靈原解脫旅人觴

詠孰盤桓得交前輩緣非淺但見狂奴意輒歡今日重來齋鏡
具嵇琴捶碎不須彈

十月四日雪

誰將佛頭青沃以香乳汁鎔銀作袈裟諸水不能濕寒山本無
身何處尋拾得封林曉煙重求食飢烏急遠人步斜磴躑躅短
脚鴨垂垂香鑪峯平挂晶簾幕但餘禹廟牆紅繩斷霞赤元冥
駕未發葦收仗全白我頭怯檐風皮弁換輕幘暖寒煮豆粥那
管釜中泣呼兒瑾北戶貼紙補窗缺蛸縮不敢出老矣灞橋客
欲啓聚星堂白戰擬初集

米貴倒屣前韻

天目奔窮流飢鴻澤中集遂令山陰賈去作茗谿客越州屢豐
年民食豈云缺過羅廩厲禁邦人暗嗟泣千錢米四斗典鬻到

褰幘新禾栖野黃舊穀堆廩白樂土受鄰殃不啻疆畝赤官廚
酒肉臭舞榭紗幃幃富家饜盤殮餘粒飽雞鳴人飢若已飢誰
解急其急新葭滿秋湖萬戶采猶得養此嗷嗷民炊煮嘆薪濕
微聞官人言何不食肉汁

痼疾

方冬苦肺熱忍俊嚙梨汁戒飲杞菊酒罷理腰腳濕一樓同母
居百病自我得肝脾日交戰氣若張弦急續脰與斷脰我體鶴
兼鳴性地存光明不受萬物糴返觀視黃庭中有方寸赤冰雪
充飢腸上接肝膽白五藏各有神絳衣冠朱幘世無秦越人二
豎肯相泣四十頭童童將復左車缺死如得歸人生如遠行客
胃虛不能運當食任蠅集

豹君稱許知廉詩太過以詩咎之

蠶子生桶中解釀花蕊汁魚苗生水中失記得藻濕物性各有
宜不待求始得癡兒嗜四始功較六經急聲如號寒蟲慧比知
暖鴨射覆偶一申終苦隔巾幘仗君揮羽扇燒彼楚壁赤乘危
發萬矢驟若雨點白庶幾倒其戈肉袒免胃憤如何扶黔徒屢
作下車泣童子樂將命速成固多缺豈宜相揖讓使之抗賓客
願疾掃么磨幕上有烏集

豹君戒知廉苦吟當勤經義再寄

瀝液傾羣言當飲熊膽汁咀嚼殊酸鹹寢處分燥濕譬如有木
泉晝夜流亦得可憐溝澮盈其涸亦何急稚同竹根笋雛類沙
上鴨正宜抱經史鐙火下帷幪他日領一軍或奪漢幟赤斯文
有正色越女天下白奇服而鵲冠不是古裳幘琥珀松身脂蛟
珠眼波泣苟非百鍊剛削鐵無不缺記誦汝何有萬卷同過客

手無朱絲繩室說散錢集

厚孫始生東椿山太守

獅兒始墮地便覓母掌汁芙蓉纔出水猶帶露華濕廿二丈夫
相似有一二得啼聲度山樓叩比霜鐘急竹驚初見孫翁喜欲
化鳴戲製桑枝弓挂向繡簾幃可知老萊心同此赤子赤百歲
抱雲仍我母髮當白飛傳太守書失咲欲墮幘云試霹靂首不
等呱呱泣犀錢祝三元庶補厥祖缺僅設洗兒筵願充湯餅客
更奉壽母車來作瑤池集

厚孫三朝知廉用前韻作洗兒詩和之

夜聽雛孫曉甜若啖蔗汁山妻抱之眠轉側辨乾濕爭投洗兒
錢老夫頗貪得暫將江祿心不畏撲滿急蘭湯春浴浴中有脫
殼鴨佛鉢矜良嬰忍用水晶罍藏去河車紫衣以繡襖赤秋水

雙瞳人漆點鏡光白胎髮鬚髻垂何日始勝憤轉憶生子時求
火厲曾泣萬事已再足一官況懸缺他年述祖吟或者同謝客
藉爲王父尸語載檀弓集

九月劉生

傳錄

補博士弟子感舊志喜有作二首

記彈清瑟發商聲老淚曾因一暗傾早達難同諸弟敏愆期獨
抱十年貞漫從張祿提前事誰識劉幾改舊名傳錄改戲咏新婚
杜陵句妾身今日始分明

書樓幾處拜燈花喜動西隣鏡聽家事本尋常等科第名成三
十慰娘耶孝經傳後難爲繼人譜摹來敢自差雲路初程多吉
士望君同作上林鵬

久不見劉豹君寄懷二首

君如元酒沛我比太羹汁澌紉喜業同治角惡材濕讀書汲古

井甘苦各有得垂老手一編較比兒曹急近時多詩人大半杜
荀鳴可憐服敗絮外借錦衣羣居難擬香山厠鬼戲李赤君張
明月眼幽暗發光白西園屋數椽小若王莽憤抱孫坐花前不
令呱呱泣婦賢治齋鹽何異耕從缺門無催租吏坐有談天客
誰作行詩圖繡君長慶集

兀然掩山樓坐盡蘭膏汁面山頭叢叢聽雨耳濕濕所思久未
見時復夢中得束筍收來書投比置郵急我病日益懶舒緩略
如鴨日治春秋經苦爲胡傳釋左氏固浮夸究勝高興赤不若
宣尼言重耳遜小白搔首誰可談髮短不堪噴每當會心處掩
卷再三泣行將就微祿庶補甘旨缺去意方一騁飛鴻已如客
雪泥幸未消珍重爪痕集

除夕家禹立兄至

雨雪掩行裝須凍涕成汁入門各看面承曉淚痕濕五年隔川
涂一見豈能得心喜問對殊意難語言急迴身抱雛孫有若雞
伏鳴燂湯暖手足戶牖下重簾解年禮先容當日兩童赤稱老
藥恒言母髮況初白兒曹酌屠蘇歡笑換袍幘豈知灰堆神中
有萬古泣我樓一人添兄室一人缺歲酒開家筵敬兄暫如客
共覆掌中杯猶是今年集

厚孫試周仍用前韻

庚寅

戈挂黃金環印漬丹砂汁遺經字含香椽筆墨猶濕玩好羅牙
盤驗彼志欲得探指擎麟豪三世此先急握劍氣猶猛勁若狸
齧鳴螭紐左手提右手去其羶食物不多攫頗異代都亦如何
棄犀錢天性守清白老夫絕冠纓煙樓小如幘抱孫豁真愁媚
祖知詐泣長成執干戈願補黑衣缺待舉含飴卮一醉去年客

百歲三萬場今日乃初集

賀椿山太守生孫倒押前韻

龍山一聲唬天半衆樂集公府開潭潭竭來摩頂客去年我生
孫此事兄尙缺今年伯仲閒咲免向隅泣爲乞相嬰兒黑子肖
入幘知從羅漢來有此鼻端白長爲賢大夫不讓羊舌赤麒麟
臥文茵重以錦衾幃乃輝茜艸湯染卵雜雞鴨坐中踏團團誰
似王述急歡生一郡春便覺萬物得虎兒氣食牛龍子體常濕
何必弄小慧瓦屑寫碑汁

送平確齋前輩游嶺南

舉酒看浮雲忽生離別感萍衣散秋河風力不能斂閒身分去
住醉面各舒慘縣旌意先搖後夢心已嵌憶昔偕計車雨情厚
以漸結友二十年歲月嗟荏苒吏局君載馳詞源吾習坎風吹

客去燕雪弄舟入剡聞君典劇郡嶺表歌廉范墨纒返梓桑繡
闥依葭菼誰料羅與浮神廳合岩丁尋詩舫停夏讀禮門豁居
賓來頤輒解論出首俱領文詞露軒昂禮法破拘檢逡巡啓庖
廚咄嗟具羹糲殺雞羽墮埒買鯽鮮躍鬐穿畦摘瓜瓞伏岸取
菱芡僮駭長鯨吞婢嘯老饕噉溫溫主益恭刺刺客方政未能
去厥矜轉欲恃其膽疎狂賴包容卞急愧莊嚴支離困撰著就
正蒙削鑿如何取螺蛤不異嗜昌歆豈云斯文契實恕白圭玷
君文積三篋一一儲琬琰戲投幽暗中射屋吐光燄翠依寶瑟
彈翰對妝臺染烏紗畫燭籠蟬鬢春風掩官書判斟酌妙墨嚴
嗤點相與素抱幽彌覺冲襟澹大兒誦經史揖讓循模範小兒
呱呱唬紅頰雙蓮菹以此賦閒居至樂夫何慊赴官期欲愆除
服月方禪暫垂青雲翅因戀白髮髡竭來天外書促駕一何遽

云資董賈才章奏藉裁擘脚踏整衣裘倉卒束衾簞恩恩別家
室去去逾吉嶺旣殊陸賈游亦異韓愈貶州民馬首迎遺愛官
無忝濡豪幕府中利濟功寧減堂哉艸疏時對案同分陝文章
見經綸此筆誰能撼操舟泛江河心手期無歉但求魚鼈安肯
觸波濤險望雲懷親舍北鄉飛鴻并況有同心人盼遠凭疎檻
但祝藥煙消不禁鐙花閃文無倘一寄風絮休仍糝賤子困山
樓病骨炎威犯謀食磬屢縣懷人夢成魘奉親媿填膺汲古淚
盈臉寧容俗子嘲怕受老僧詔坐臥敗紙堆泛涉真成濫每思
深谷情味永若咀欖安得消搖游南溟縱吾覽

游柯山寓園七首

郭西廿五里機棹柯山前仰矚普照寺一鏡天空縣岑樓嵌虛
空石佛龕其間現此丈六身斧鑿誰雕鐫頑石具知覺托聯香

火緣寺東聳雲根孤立不倚偏
蕭蕭多羅幢百尺栽青蓮又若
直挂龍轉側鱗鬚旋俗名石香
爐裊裊霏晴煙萬匠削不盡一
柱空中全想彼斷鰲足立極樞
青天古迹類如是何待鑒吾言
山風欲動搖去去巖牆邊

寺後卽柯山山石環兒孫石窠
若蓮葭九地通幽門積鐵互破
碎或有屏幃存縮處匝僧宇豁
處開城闔環以七星潭列宿誰
敢捫失足苟一墮駭絕潛蛟吞
巖頭祀文昌躋次居其尊閣道
比飛棧上覆垂天雲

柯亭不可覓懷哉十六椽中郎
冷澹游賞之亦可憐或云翁子
居傍此崔嵬邊行歌妻恥之轉
受嗟來餐飢時重一飯旣貴何
有焉白頭死知音焦尾誰與全
俯仰發長嘆出處如斯難

修篁綠叢叢門掩石竹居竹上
鋏姓氏游者知誰與照影清水

塘中有聽經魚學究領兒童正襟講唐虞狼籍堆殘編不識何
代書據案欲與言竊恐驚樵漁老僧補破衲鉞折將何如
祇園桑猗猗下覆清泰庵一二優婆夷種菜攜長鑊幼者鳴繰
車解避游人男掩面亦見佛殊費聖姊參七女尸陀林帝釋茫
然三髑髏生何處欲與者婆談

泛泛溫泉鄉遂詣青蓮院門前一丈碑是爲祁公建特書生死
年已覺該全傳衣冠坐溺處水尙盤渦旋潭潭中丞墅捨作空
王殿方塘界層廊前後香臺閒僧廩富杭稻佛產公遺佃公裔
滿前邨多年缺饗膳

展謁四負堂瞻公像如生秀眉映疎髭炯炯雙眸橫天柱已崩
折有手焉能擎臣年四十七一死心已明國家重科目報者同
斯情尙書丈人行此事慙其甥寓山峙堂西竹石猶崢嶸吾鄉

有止水同此千載樂誰守江南祠藁藁聞履聲

題夜登黃山圖

萬里一輪月黃山夜最涼蓮花開雪色雲海出寒光
剝手波寧濕橫衣露有香天風欲吹去身世久相忘

畫和合

寒山拾得兩禪師齋厨向火無言辭石巖滅影誰見之
偷來寫作和合姿豐干饒舌問邱悲菩薩示現空爾爲世人相友藏怨
容李猫咲口常嘻嘻兩師蓬頭赤雙脚不知遊戲有何樂瓦鉢
爭疑聚寶盆葫蘆可賣交歡藥官街市肆處處縣是仙是佛俱
可憐人情本是秋雲薄拍手來分利市錢

題俞石隱餽耕圖

辛卯

兒帶經田衛組婦行饁入事姑力田孝弟就徵辟古人則然今

絕無士無蠶產家無宿糧應有司試得則氣揚黜則無所之餬
口四方耶娘妻子不相見顏低色沮農工商爲郎爲大夫各有
所畏兒事上官躬已瘁豈無老親飢飽寒暄兒嘖嘖親心自傷
兒自貴官有俸錢倩人買良田田疇肥瘠不可知奪牛或及于
訟焉田閒有士啞然咲有母白頭可以孝有溪有壤可耕釣縞
衣綦巾從我好自展溪藤寫形貌獎婦來窺婦曰尙五穀熟納
田租洗脚歸提葫蘆殺雞炊黍爲母壽不知爲郎爲大夫謂予
不信展斯圖

禹廟

山河不改一碑存尙有神雅集廟門萬水朝宗才力大九州陳
列帝王尊桑田已見沈江海似姓依然認子孫贏得游人看
石年年風雨長苔痕

爲熊中丞題湯畫鐵竹

老樹化鐵我所聞誰鍊黑金成此君曾憑火力作霜雪不藉墨
氣爲煙雲疎葉斜枝自相倚龍門百尺桐難比閩風過處不能
搖君子之身固如此

戴山院桃二株紅白連理今年白者漸變朱英因爲作
歌

山堂並立傾城姝縞衣紅袖姿態殊過牆修竹翠帷卷兩美妝
竟纖腰扶根枝連理肩影亞朱顏素面亭亭俱春風嬌我意何
厚歲遣尤物來相於老夫學道鮮姬媵小婢麤醜辭妝梳助嬌
解語借之子尹邢環燕誇同居樓中置酒日欣賞光豔似襲仙
人裾邇來酒暈侵玉膚素女雜佩丹砂符却憶吾家兩梅樹花
時寂寂嗟向隅飄脂墮粉少人見天天爭及雙羅敷石城姊妹

王家妾比並風流兩不如

花谿泛宅圖

麴塵乍染宮眉葉脂暈初迴含咲頰暖氣都從錦浪生柔波恰
共春羅疊數聲漁槳出鷗沙入饌蓼蒿與荻芽嬌兒嫩比谿邊
鴨小婢娟如岸上花釣徒合向煙波老不辨吳淞與三泖誰偷
谿鏡照妝梳自展蓑衣裁襦袷江鄉屋小野人居繞屋荷花萬
頃餘門底谿流壓簷潁船中家具雜圖書烹魚煮酒搖船去醉
卧蘆汀不知處我亦江湖泛宅人柳枝遮斷桃花路

夢游西嶽作

萬馬西來野色寬蓮華開出古長安仙人雲卷爲衣好秦帝鞭
驅入海難壓地較他東岱重倚天曾障渭流寒山靈未識文章
伯不放韓公到頂看

蕭山道中

林雨滴初霽曉暉含濕煙江流青隴外人坐白鷗前澤國堤爲
命巖疆海拍天子心方耿耿茲事等籌邊

杭州

馬塍花外路一葉夜行舟四郡形相倚通都地欲浮舫聲銜尾
下行旅及關愁失咲思南宋偏安到此州

蘇州

句踐何爲者能亡泰伯家雄封歸德讓習俗到繁華子女供游
戲笙歌醉狹斜誰知霸圖烈虎气作鶯花

丹徒懷錢雨時

汝恭

明府二首

官已辭京口江仍繞縣門至今吳父老猶念越王孫三代存遺
直斯民易感恩當時老兄弟尊酒共誰論

憶昔通門友長安兩少年當官十四載各自感風煙吏局君將
起江船我獨眠栖栖苦無事頭白對殘編

嚴先生祠

一代布衣尊荒祠萬仞存故人古巢許天子漢兒孫賜爵寧知
已占星或感恩時常釣魚罷仙女與重論

重訂石帆集戲柬豹君

勲名有時命士窮重文詞貴人不解玩所賴知者知水澄七十
翁一卷常抱持平生富篇詠傳後期在斯改本織丹青心苦察
幾微示我再三讀頻年絕編章老作天台游莫慰劉郎飢仙人
不可見歸來髮如絲自言斷聞根尙幸希非夷默坐守嬌女耳
名嬌阿翁要聾癡杜門謝賓客頂禮人天師翁近日註金剛經屏絕世俗
言擾擾相警誓我爲啞然咲休徵信期頤聃耳豁三門天柱不

傾敬君耳不容麥上壽理亦宜六鑿塞其一吐酒何煩治豈若
河東農有蟲蛻於茲君常眼作耳仲車書達愚牛關輶鐸鳴作
勞或有之割耳謔晉卿啓牖煩眞妃我能手代口畫鑑可尋範
敢云唾而去轉令荆卿疑我聞沐胥人龍虎相騰馳又聞兜元
國天地開藩籬翁詩納萬籟師曠奚辨爲只愁領上癢其聰異
常時便號雞冠翁一洗充耳譏

嘔酒詩爲周海山

煙

先生作

地鑪暖深罍酒香生座隅緩火蒸融融感發看浮蛆截竹爲留
犁露頸沒其趺主客次第嘗吸之嚙徐徐中通風過簫暗引樂
出虛注泉便作醴仙釀逡巡如鑿面白水添罍底醇醪儲貫糟
出沈齊氣體成須與枳橘性則一涇渭源豈殊神丹變兼金黃
芽轉河車物理可旁悟速化然非欺再拜求釀法酒經願箋疏

秔稻殺梁稷皆可鞠藁俱和以衆露香若點塞上酥百花歸蜂
衙五金同一鑪至味啞乃出淺嘗得其粗蜀有雲安春復有郫
筒酤可惜少陵翁取醉徒谷且東坡不解飲真一堪盧胡啖
道士蜜寧發調水符浙人尙越釀六載糟邱居今夕換別腸沈
酒不願餘只疑虹首垂又疑斗柄斲底須吸西江欲續無功書
久出醉翁門才識涪溪醕彭宣醕侯芭是皆聖人徒

尋天聖寺觀管夫人竹及松雪翁瀟湘煙雨二畫壁

頽牆蔽敗簷題曰無塵殿盤楹賸雙龍云昔曾錯換西垣展二
丈上壁修簷倩下壁煙雨翻似有湘流濺真迹久悲滅墨氣隨
龍幻補者蔡鼎臣枯林發新箭規模或形似氣韻人天判遐思
比肩游玉腕千鈞健怒掃青鸞翎蕭蕭響深院翠珥咲相扶紗
帽風枝顫乃翦巫峯雲掩映君山面中藏二妃淚露漚唬痕泣

風流昔已傳遺韻今猶見佳耦古絕無邈矣神仙眷不比林靈
素淪雅元妙觀夫人製竹譜說理泠然善壞壁且移人流連忘
眞贗

偕椿山太守東井明經游弁山白雀寺四首

柔艣劃春波悠然出北郭枉渚接迴汀蒼弁晴煙脫使君偕二
客籃筍度林薄交空綠雲垂夾道青虬攫前詣石斗山古寺飛
白雀禪栖久荒涼香火尙如昨仕女豈不多吾思本無著

梁有優婆尼道續字總持誦經十萬部乃證人天師舌生青蓮
花香出陀林尸再世名抱玉身化三生奇至人儼不壞塔記留
殘碑金剛卽堅固梵夾文字遺持誦便獲福此理誰能知餅開
雀飛去勿守空琉璃

東巒峙虛亭具區可一望四萬八千頃雪氣橫天上弁陽三龍

潭神井各萬丈行雨龍所司眞實說无妄連旬苦天漏朝曦澹
層嶂欲書祈晴詩臨深一投餉

岩薨法華山下貯水精域坡公昔來游觀者如今日翻杯潏紅
裘主客風流極由來天所械仕隱兩難助柔陰碍帽檐徑轉肩
輿側偶現宰官身念彼觀音力連船載桃花春風好顏色

題墨妙亭

郡齋歷四代不見孫莘老尙有逍遙堂破屋埋春草遺筆皆龍
騰殘碑迹如埽懷題襲舊名依牆一亭小當時韓翁吟已悵蘭
亭渺尙與杜陵訟肥瘦各娟好之而躍四壁一一競天矯豈但
三曰坐評賞徹昏曉手把烏程醅蒼顏共傾倒公府歲月移不
免歎枯槁後人強解事胸臆日紛擾各以世俗書標咏苦爭嫺
昔聚今已散柱礎遺踪少金石且難恃虛名未爲寶

拜胡安定祠像

富包與歐陽賢者各當位乃有真先生教授蘇湖地治平賴醇
儒體用必兼備兩齋對我我治事根經義人才蔚然興紛紜台
輔器三奏說師承劉韓信高弟偉哉太平業一一于斯肄空言
談性命所學不堪試時無濟變才遂墮崖山涕可憐一草比乃
爲邦國繫遺容肅緋魚壞屋衙門閉奈何尋秋人但賞庭中桂

忠雅堂文集卷十九

忠雅堂文集卷二十

詩二十

鉛山 蔣士銓 心餘

喜晤吳蓀圃同年作八首

去辰

送君知象州謂君書生耳七年復相見所聞竟如此才力用乃出其心貯源委達材無弗宜守官安所止所以南山詩爲民歌樂只

州民有覃叟元夕觴雜賓婪尾遠方備腹痛亡其身如飲堇汁壽百體斑斕陳叟夙稱長者叔子寧鳩人獄成官獨疑五聽求其因百訊只一諾乞死不願伸叟命縣杯蛇官賜轉車輪細檢死者褒中有殺蟲藥誤投畢乃命聚鐵難鑄錯試以三母雞如取彈殞雀官喜民笑呼雞亡叟存活從此官興旁時見叟拜卻願化明頭蟲相隨琴與鶴

投艱後左州邊城大如斗城中二百人街衢一無有三十六土
司基布列郊藪獐猪充百役刀耕火焚畝臥理則有餘粵風吟
續九邊牆二三尺交趾隔門牖苟無插羽書無譽亦無咎

忽用滇南兵飛檄從天來牛馬數百頭火急軍符催一手舉百
鈞大吏嗟其才潰土煎山泉牙硝雪皚皚兩旬廿萬斤入礮轟
晴雷露處廢眠餐官心幾成灰

土司膏粱兒每受土目制太阿苟倒持何以肅邊備漢官往理
之稍失便多事豈無武健官奉委輒惴惴更番策青驄出入君
游戲喜怒爲恩威男女皆伏地使君如父兄盡壽不忍置留侯
若婦人嗟哉勇而智

養利立州城檄君往興築雉堞參差固勤勞上官錄將遷鶯羽
垂曰歸持父服官衙若營縣生事且日楚三年抱遺經坐授生

徒讀豈惟叙，鈿盡裘葛俱。典鬻只有千首詩，光燄穿破屋。
蕭條賦北征，爲貧仕有然。訪我越王城，我亦將去焉。酌酒各傾
吐，情慄相纏綿。遂聯入吳舸，銜尾春江前。舵樓開庖厨，饋餉交
盤筵。所語出心得，樹立期勉旃。汀洲好寥廓，讓我好熟眠。

京口宿袁春圃觀察衙齋

來鴻去燕忽相逢，便覺情懷較酒濃。官燭燒殘眠不得，隔城聽
打蒜山鐘。

同魯白堠侍御白澄山司馬宴金山江天閣題壁二首
萬馬飲江山，拜佛一鼉擎。柱海當門虛，無不礙天原。闊倚傍全
空，客自尊指顧。雙姑稱伯仲，牽連八陣作兒孫。底須更動凌雲
想起拍闌干，酌酒痕。

去天離地幾由旬，便有雲遮上界身。燕雀豈知黃鵠健，魚龍終

讓白鷗馴鼓聲落手同軍令鈴語低空喚渡人一任春潮爭起
伏看他孤立總嶙峋

再晤吳鑑南刺史有懷程魚門

晉芳

二首

越王臺畔別恩恩遠夢新愁一笑空十里珠簾花影外二分明
月酒杯中東流水健山如馬北向帆輕客似鴻惆悵竹西芳艸
路笙歌不見紫髯翁

煙花三月雨冥冥醉煞揚州酒不醒江左文章諸老盡淮南鐘
鼓兩人聽玉簫嗚咽橋難倚金氣消磨鶴尚停收取春光入行
篋來朝七十五長亭

題芳潤堂

兩層簾幔絳紗垂壽母傳經是我師種得長春花滿院先生堂
北奉觴時

題抱經樓

談天炙轂一編書四十年來老蠹魚獨抱遺經觀物理此樓雖小亦吾廬

前明五君子墨迹冊子爲彭進士

紹升作

天啓丙寅夏徂秋先朝正人一網收文言廷弼張兩獄出此入彼均囂囚精靈在天不可見翰墨落地誰藏留眼中笑兀五公字曰楊魏繆偕兩周應山最蚤成進士女子小人爭切齒豈有貪贓楊大洪卻與諸賢同歲死當時季侯景文三同年繆公特識排瘋顛閣中論事宰相愧郊外送人天地憐大書斃獄四月晦一死獨在諸公前嘉善行人稱後進鍵戶入朝風骨峻墨吏苞苴且避門債帥金銀偏入費君不見罪人親家同臥起畏死必非好男子八竿女鬼究何爲一笑吳中五人死季侯蚤祖王

德亮東林側目疑非賢高名何必入黨錮毅魄一樣誅神姦同
時君子不止此五札留傳到君子桐城一幅乃割去手迹寧容
雜疑似嗚呼宗建罵閹目不識一丁何以解乞昌期作墓銘小
雲栖頌書就了心事正文筆豈染南園腥彭君學佛參龍樹
語言文字歸何處真性原憑節義全斷縑合有人天護吁嗟乎
五彪五虎十狗銷游魂五賢遺墨今人尊虎邱懔懔夜相語願
將此帖化爲疋練縣吳門

田園主人畫治春詩社圖卽阮亭司理紅橋修禊處旣
爲作記綴詩十二首

難覓風流杜牧之綠楊城郭故參差如何一片紅橋水腸斷漁
洋七字詩

廿四橋邊擘錦箋十三樓上試箏絃畫船簫鼓都如舊不見詩

八百九年

迦陵詩筆自縱橫
昭令歌詞引曼聲
卻要東塘誇後勁
煙花惆悵讓多情

濟南久荒名士軒如梟
已廢辟疆園冶春猶是風
騷地粉蝶黃鸝莫鬧喧

嬉春多少踏謠娘
五烈靈風繞蜀岡
一種桃花學人面
隔船吹過酒痕香

誰與歐蘇可比肩
鄉人眊噪祀三賢
專祠合鑄紅橋像
一盞寒泉薦水仙

瞥眼雲煙論定時
文章漁獵鬼神知
墓田孤負揚州好
誰立生前短簿祠

探花

王君文治

前此做春筵御史

魯君贊元

風流太守

陳君用敷

賢更約邊

廷掄

袁鑒兩觀察累他名宦作神仙

新月嬋娟恰上弦玉山頽後照人偏多情只有金夫子燕兆一醉

花前一惘然

仕女傾城秉燭游人生只合醉揚州衣香鬢影年年換只恐看

花易白頭

柳陌花谿過眼空苦將泥雪印飛鴻幾人閉戶眠春晝夢入千

巖萬壑中

苦道今人憶古人酒闌歌散亦傷神田家園子無多地占斷紅

橋一角春

冶春園小集看牡丹二首

紅橋樓畔貯春雲鬢影衣香畫舸分詩老社遺修禊會主人家是
孟嘗君花開一品叢仙髻歌昵雙鬟記錦褱想見當時游冶

地夕陽留住杜司勳

銀櫓緩捲白波迴難得分司御史來花底鳴騶迎月去柳邊鐙
舫隔湖開幾人名宦生前酒滿眼歡場掌上杯能趁芳辰文字
飲若吟君是出羣材

題史道隣閣部遺像小引

乾隆癸未正月予于燕市得公遺像及四月廿二日家書卷子
藏閱十載壬辰客揚州公裔孫開純假摹一幅以崇守祀圖成
屬題幀首

士不飽不先食未授衣不先御短小精悍目有光廉信與下均
勞苦國史大書如寫真須看凜然社稷臣生不逢時死得所雲
臺麟閣嗟何人遺言欲葬孝陵側公屍已潰那可得梅花嶺頭
冰雪魂生死南枝最孤直袍笏作身將作兒文璧子孫非我支

請看前世旋螺髮換出新霜兩鬢絲公當蓼賊謀兵禍半夜朱
衣獨危坐神光照人賊駭竄始信相公難得臥彼時狀貌若此
圖斷幅流傳半有無偶隨神物金函守終始兒孫鐵筆摹挂向
祠堂生氣勃伏臘年年採薇蕨南都戰壘艸連天北嶺梅花香
到骨吁嗟乎公不講學不立黨遭大投艱毅然往宗澤難平統
制誰張詠空留益州像家書紙紙飛血痕容衣誰揭小東門不
如柴市招魂葬齒髮猶歸信國墳

送巡漕魯白堦御史還朝七首

悠悠四方人共列春官第遂爲同年生序齒稱伯季索米金馬
門所職有同異六官領轉司佐理掌邦治經生習空言漸曉家
國事可憐雕蟲人詞賦騁才思

君時佐司空考工傳令聞周禮有闕文一一資討論辨器而飭

材把筆若游刃神霄瑱闕中許領百工進溫室樹如何知君默而真

選轉防清要畫省尤從容須臾坐南牀出跨桓典驄秋霜豈不肅古栢含春風凡其所歷事陰翳皆消融參政本魚頭白簡無雷同丹鳳鳴朝陽美矣聲離離

千艘挽吳杭江淮所由始明年轉南漕持節卿往視繡衣捧制函駐馬瓜州渙號令乃一新如入臨淮壘如入患疲癯砭石爲一起約束文武吏若以膺使指潮痕與風信驗測不移晷牒檄投行轅尺地縮千里水陸具壺漿歡迎眞御史

春風緩油油吹我過江北相見茱萸灣澄波照顏色二三同甲人當官出宣力久散忽一聚各領臺司職咲我蝨其閒花前共游息竹西富亭園湧現華胥國拍浮畫舫中蜂蟻同轉側此樂

可忘死萬事等雞肋

十里一扁舟往復燕城下君來必我造僕隸知文雅兒曹親父執依依意非假玉壺買春醅爲君時一瀉意長晝偏短語雜心難寫忽忽唱驪駒嘉會後時寡

君行淮北途我臥淮南屋計程量陰晴安穩花驄速復命歸所居和气融花木投懷捧嬌兒紅雪隱肌肉定將三婦豔譜入江南曲豐臺海澱間重轉緇塵轂故人豈不多有客仍初服若見南飛鴻風前當念僕

竹西寺再送白堉用壁間東坡送李博過嶺韻三首

朝陽重鳴鳳盛世輕寒蟬諫官守遺直榮落如雲煙轉漕始江淮得君泯危顛好風逆千帆不待五兩縣退食弄扁舟有若乘查仙褰屐多素心亦有時世賢汪汪千頃陂中納萬斛泉行衙

貯春氣雜樹皆便娟縱筆判官牘墨澹驚鴻翩儒不習吏事斯
言豈其然

大戶吸川鯨小戶飲露蟬醉徧揚州花豈但月與煙愛看柘枝
舞君亦萊公顛酒酣寫新詩人驚柳誠懸廣文最儒雅興會尤
僛僛牽率異鄉客合綴同甲賢與君作遨頭關喚平山泉豪家
宴紅裝衫扇偎嬋娟不若文字飲巾袷來翩翩如何唱驪駒折
柳同淒然

昔展蜀岡搨紙開薄翼蟬今看竹西碑墨帶旃林煙同舉送客
眸共注牙樯顛沽酒設祖席各解金魚縣侍御持節歸不披班
生仙豈等出嶺表僅作觀風賢離心戒苦語別酒飛甘泉醉鏡
紅頰兒睂月同娟娟雲閒一鶴翥沙際羣鷗翩寫圖泐壁去夾
路松明然

六月同安人往秣陵遂登栖霞留連半日而去僧雛樵
婦不知誰何也二首

聯車似向鹿門游雙鶴飄然一徑幽羅轂上追飛鳥疾縞衣時
爲白雲留難尋翼缺揮鉏地久別文簫寫韻樓繡幃雕鞍已拋
卻果然簪珮落林邱

松濤石浪坐低回展放愁眉咲眼開偕老煙霞最宜稱累他猿
鶴屢驚猜游仙境迴憑肩過采藥圖新把臂纔歸寫夫妻改裝
像布衣休浣攝山苔

明日城中傳說有夫婦游踪甚異者子才前輩來問戲
書奉荅

田夫汲婦互穿雲老佛低徊苦不分客路偶然攜簪屐游踪未
必感星文漫勞史筆傳遺事卻被山靈識細君誰與洪崖攜小

影鹿皮冠畔著青囊

贈吳魯齋明府二首

先生澹蕩人手把一卷書淵淵可以仕乃佩銅魚符轉歷三吳
聞所至皆有譽粹然滿月容繞座青芙蓉憫茲衆生命疾痛皆
與除政平若流水潑潑游羣魚

民不知官尊官亦忘厥位宴然繁劇中不見有難易上官豈不
威對之平盛氣乃知君子儒藹藹多感被如何局脊人辛苦爲
俗吏

李園高詠樓銷夏十二首

仙侶同舟趁曉移簾紋生怕濛朝曦入林杪簟匆匆具撥棹笙
歌緩緩隨

酒旗低卷綠荷香柳與花汀互掩藏魚引游人戲蓮葉四圍穿

金雅堂文集卷二十一
到鏡中央

月榭風亭轉側空昔人高詠有誰同
闌邊擁出千枝翠樹杪飛來一繖紅

芙蓉臉際美人多十二金釵值幾何
若化鴛鴦眠到老不須惆悵賦微波

偷聲減字泛清商花氣迷離水氣涼
卻把游船暗留住隔牆吹過粉痕香

陂陀展放地寬閒疎處前虛密處剛
獨讓斯園稱秀野隔江移貯兩煙鬟

隨意披襟坐綠苔蕩絲衫子碧簫杯
桃笙展處都無定蟬曳殘聲客往來

夕陽簫鼓幾船歸涼月初生夜氣微
要看空庭橫荇藻不教蘿

薛挂絺衣

星毬五色湧光明千步廊開一夜城一桁曬珠三百顆勝他林
杪挂銅鉦

那須畫燭轉銀缸密綴高懸百寶窗一葉一花鐙一朵影從波
底各成雙

夜半移鐙上畫船殘星明滅尚分縣一聲長笛穿橋過吹散垂
楊萬縷煙

日較城中一倍長幾人消遣好年光來朝寫入生綃裏還帶蓮
花隔夜香

六月十八日避暑湖上次兒子知廉韻

銀蟾略減二分圓出郭荷花已蹶然柳幔濕浮初日上露珠香
走曉風前一機雲錦舒纔半十樣鸞箋染未全底用追尋河朔

飲此中應借酒爲年

三絃曲

三條瘦玉雙銀甲重撇輕挑看指法左手依絃往復還如閃流星度空砒細響將沈每被揉雄聲欲放頻遭壓彈指停時韻尚留捺痕過處音猶狎受風斜掠燕喃喃坐桺交啼鶯恰恰花片疑隨落葉飛簾紋似有香絲納有時賺豆撒珠毬白雨迸堦刀出匣賢王夜獵萬蹏歸大將朝馳千騎還彈丸脫後月都圓舞裏旋來波未乏絃戀聲歡玉笋開聲偷絃勢春葱指管生年少擅此技每向鐙筵並巾幘竹聲襯配更和諧鼓點相參不羨雞就中吳生好顏色絕妙歌喉最調洽醉人幽意酒三更移我閒情春一霎劉郎白髮逞風懷此樂終年付銀蠟錦幔垂垂護曲房鵲鑪裊裊依琴榻館名我願榜鷗波教寫疎簾掩清霄湘靈

算漫在蒼梧楚客分明宴巫峽秦箏趙瑟兩茫茫願枕三絃傍
簾押

喜家繡躬叔至

一片華山月隨翁到廣陵欣持介肴酒同翦讀書鐙七十聰明
健尋常跋涉能過江還擊楫扶老不須藤駒齒斑爛繼驢腰卷
帙增八年離緒積千里舊歡承簋食分甘旨支牀視寢興詩酬
漁唱永夢謝鶴書徵池館豪家競河山古迹仍尋芳人雜遠遣
日醉曹騰歌吹聲如昔繁華感不勝青春誰得負綠鬢爾何憑
叔有黃茅屋門依繡壤塋但聞盤澗樂不慕廟堂登孝義相師
表文章互友朋諸郎誇早慧仲子慶同升祿養期方遂風雲力
可乘吾衰憂刺促親老歎鬢髣卅口蓬蒿徑三餐粥飯僧當官
原有命沒世竟無稱落落難迴趾栖栖但曲肱眼迷三里霧心

冷一條冰已達嗟如此長貧得未曾居慙營壘燕身遜脫緝鷹
長者提攜久中年懶惰恒栖遲何計足漂泊此生應冠蓋奚堪
倚齋鹽只自繩天涯重惜別不覺涕橫膺

題瓊花觀圖

庭內栽花晴雪光井中製藥丹砂香神仙游戲偶一露井不可
入花難長天神地祇列郊祀富媼憑誰傳姓氏蕃釐立觀闕千
秋求福迎祥都已矣瓊花自是揚州葩入杭入汴皆不花露盤
移去絕沆瀣羯鼓擊破無萌芽李花楊花開落頃換山冬青壽
年永洛陽爭獻姚黃嬌建州各進龍圖餅阿廢羣芳列金屋不
在區區一枝玉蕪城本是帝王家碑史流傳非實錄紛紛烽火
照南都禁樹宮花幾次枯孤亭尙廢無雙宇絕豔空圖第一株
轆轤取汲春泉滿地底疑通九仙館試問丹房白鼠身可有神

鞭爲收管玉鉤芳艸艸不青玉句洞天春已屬道人夜打梅花
磬驚起秋原萬點螢

秋聲館題壁十首

八九月間成室二三更後讀書不用玉簫金管清商蕭瑟自如
闌干卅字亞字簾幌波紋篆紋妙悟不留色相觀空得自聲聞
幽花靜若詩老修竹疎于酒人雙荷不通不蔽三籟孰假孰真
三千毘耶一閣五百大士此城欲聽樓中雲影先觀郭外江聲
雪壁龍蛇欲動泥牆戈戟自排歐公三日駐馬蕭郎一字名齋
野客牽蘿作幔幽人集芻爲裳不若江淹竹帳筆花夢入瀟湘
金銅老仙不見化爲千歲靈龜元鶴翩翩下止莫是當時令威
瓷兔雄雌撲朔錯認竹根兩颺一切有形如是雪師紙虎泥牛
注本忘其是客秋亦何曾有聲姑妄聽之一咲四時喧寂分明

秋心何處可遣文字之友數來絕勝笙歌院落夜深鐙火樓臺

邊丈隨園

連寶

用岐亭韻作詩寄題拙集疊韻奉謝三

首

百過誦翁詩五液各輸汁開合海瀼瀼解會川濕濕潏泉敢同
流至味讓先得祖身繡摘句如劃桃皮急半生跳井梁躍踴類
土鳴連營守蛛網經緯覺綿幕突逢遼羅漢一幟千丈赤聲纔
應手鳴氣已界天白儒將立期門但戴平上幘孤軍不能支四
面楚歌泣我膽忽破碎遡彼秦牛缺可憐烏合徒亡命作輕客
疾呼東南人來讀任邱集

誰舉進士科笑飲三勒汁由來速化蟲厥昭乃生濕白頭一鐙
槃齊楚孰爲得讀書如張雍性本急中急或稱吐綬雞或作戴
石鳴如何有司眼紅紗遞相尋丹砂信可磨難奪本來赤苦吟

萬篇詩誰惜數莖白虎觀苟得登寧愧納言幘眞儒老蓬蒿學
耆互悲泣秀才耳豈多處士唇未缺朱雲折角才反讓五鹿客
不逢暴勝之嗟哉東野集

幽蘭有本性肯借鹿醢汁匡居高鳳齋上漏而下濕翁亦廣川
人董相宅居得鈔書老眼明百事非所急卻感長身鶴顧此短
羽鳴勿惜黃金鉤撥我秋水琴師承誓不肯骹擲看六赤鈍根
異敏妙實愧馬希白久拋惠文冠願買入學幘朝偕樊遲游夕
免伯俞泣同時有伏生說經齒微缺執業許相從請師河閒客
何必後世人始貴雲亭集

再題隨園無雙譜詩後

無雙譜中四十客始于留侯終信國畫者咏者金古良久向詩
壇誇絕特任邱丈人耐不得萬事參差塞胸臆金剛神勇菩薩

心放出獅王真氣力老吏斷獄誰敢移比例森嚴刑賞直拄天
檄地筆一支誅殛奸回發潛德肺肝千載不能藏魂魄九原無
處匿短兵相接妙入神棄甲如山俱敗北想當淋漓下筆時西
崖鐵崖都變色讀書萬卷乃有神此事平生幾胎息吁嗟乎不
須更看無雙譜翁有無雙新樂府作詩何異作春秋三千餘歲
上下古

懷李再來二首

龍驤滿廢士如雲遮蔽江淮偕一軍名將談兵揮羽扇詩人相
馬識蘭筋紅鐙記照花前別清嘯時從夢裏聞頭上揚州二分
月可曾遙憶杜司勳

隨園風月尚無邊北望旌旗信屢傳席上貂蟬都借箸淮南雞
犬亦稱仙感來離索何嗟及事過追尋各黯然鴻雁拂天魚刺

水帛書應落繡鞍前

題法苑珠林謝夢因上人四首

莊列言神仙左國陳妖鬼離騷說地獄遊戲爲文耳六朝尚元
談竊取無生旨佛經本不多遇欲存天理附會梵筴書詭怪欺
愚子斤斤司果報瑣屑何其鄙于此不能空所空先泥矣

萬物自起滅轉輪毋乃煩解脫卽死耳貪念期生天現在忍枯
寂求福虛無閒大姓婆羅門富貴享長年救度衆生願甘露誰
寶餐佛未入中國何處栖聖賢不聞三代人魂返毘尼園

佛不尚語言亦不尚文字六百七十函毋乃傷詞費憚公撰珠
林種種搜奇異我愛其荒唐說鬼資破睡向師乞殘編手錄相
補綴稗史小說同不必求精義師本智慧人逃儒亦遊戲成佛
究何時咲指蒲團地

默默蓮臺人袒跣亦何樂然薪而鑄錢所見豈云薄讀書澹榮
利是卽不染著布地求黃金誰解空門縛師尋夢中因因盡緣
乃脫利口箭鋒機談柄宗雷托于法了無涉貝葉皆可灼還書
免一甌他日具酥酪

江蔭畦明府以琴魚琴箏寄餉各報以詩二首

赤鯁旁支涇上隱曾與仙人守丹鼎胎息猶含藥氣香鍊形真
駐桃花景吐盤爲鯉豈荒唐擲米成砂亦俄頃族繁身小不成
丁穴遠家移久辭丙猷州賢宰烏化鳧散網雙鳧引鴈魚順流
應是丹成後出水都忘鼎沸初共命江湖同白小蛻口僵風易
枯稿作羹淺穀亂銀絲入釜空紋浮荇藻香心廟畔唱春嬉羅
隱墳邊晒網時封題寄我千頭細吐納憐君九轉遲感舊難忘
翟司馬十八年前詩再寫賢母攜來語最真此魚不是官中鮓

琴魚

竹西老筠化爲石日與吳兒煮牀簀故人寄我涇川鞭玉版中
含水精液嫩軟可挹鮮柑殊天目所產匡廬俱瀟湯取味最清
美風致遠勝園中蒨贊寧之譜廷秀經愈喜作詩皆可聽成林
不免捫作紙刷土忍使同參苓請君留長青鸞尾僊子能騎歷
眾卉不然作箭射天狼勿縱雲斤傷有斐

琴筇

三善詩三首

有序

乾隆壬辰十月于邸報中得闕歐陽蘭畦廉使章奏請以江西
停葬溺女銅婢三事下部立法禁革掩卷三歎謂公能正人心
而厚風俗也范文正守并州范忠宣守太原趙清獻守邠州類
皆澤及枯骨而贊皇昌黎柳州布令放贖奴婢至千百人公用
心仁慈案異哉至戕害子女惟悍妻繼母開一行之未有施于

親生活不爲痛者宜公尤深惡之也夫三異十奇古之美其長
官者有焉予作三善詩謹誌公德非竊治蒲餘論也孟子曰好
善優于天下蓋以此企之云爾

芻人掌兆域大夫掌族葬年月各有制封樹戒相妨焉敢擇邱
陵而蒙拘忌誑枯骸求富貴人子心久喪遂惑青烏言百計營
一壙葬者恣侵盜不葬成坐忘藥裡或難求幣藹豈無恙民愚
士夫鄙停匱屹然向堂存數世棺閤閱侈儀仗解組乞麥舟顙
泚孰惆悵於戲歐陽公蒿目默悽愴赫然具封章論列陳事狀
秉彝旣淪亡感發變態創頽風倘能移結艸安可量
青夢徵虺蛇璋瓦詩並美如何女子祥耶娘仇敵視呱呱離母
身若以石投水殺之不須與宛轉盆中死耶如鶩羅娘若摩
登鬼環以助虐人嘖嘖相勸使戕親不加焚掌戮官失理禽蟲

重胎天何況出毛裏充此忍毒心賊害將何底於戲歐陽公幼
幼憐赤子被罰申厲禁科斷及隣里生男名杜生女例同此
頽風倘能移盡喚歐陽氏

司隸掌奴婢罪人本無多媒氏判婚姻恐傷天地和德裕鎮西
川鬻婢分條科三五列年限歸贖除煩苛韓柳守大州脫免離
羈囹怨曠苟不形豐樂登嘉禾陋俗錮老婢誰得操斧柯兒女
榮成行厥父爲誰何多見少所怪雞鳳移巢窠葛藟散本根牛
呂宗支訛李沈放青衣鍾離嫁媼娥古來盛德事奈此冥頑那
於戲歐陽公開籠縱鸚哥陷阱旣解網一一松依蘿頽風倘能
移女貞樹婆娑

害劍

閩客多盜葬鉛山無完墳長鑱劓前和鉤骨如探丸拋棄不知

處藏魄成游魂搜包納其骸安寢前人棺墓前立假豹拜掃滄
偽真鑿石埋深山使長莓苔痕乃造買穴券倒註年月旬舊尹
新尹閒竊用官印文可憐麥飯香不辨誰兒孫及覺而互訟官
視皆等閒十訟不一結結亦非所論罰金買尺土姑令塞者安
豈知謀時心已拌囊中緩或予笞杖罪受者顏欣欣敢惜敲撲
細易此牛眠真土人失先塋飲泣冤莫伸安得良有司噓風埽
浮雲凡有盜葬者剗期墓門遷之不待時鬼魅難逡巡誰非
斯人子罔恤戕亡親盜葬苟不理理之苟不遷誰謂及有司庶
策悔者惜積案十餘載家破一二存良田與美宅大半歸蝕吞
版籍各有鄉奈此豪強民山靈利錢紙付之不見聞生人且失
所何況骨數根君子有四端惻隱資賢臣

送同年薛補山

守延

編修歸樂陵七首

君初江南游秀句爭傳寫傾倒隨園翁歎美眞儒者不攜一卷

來縱筆十行下驚呼行祕書文彩兼楊馬我時羈越州雙手不

能把高

東錢伯

誦君詩豈謂知音寡登高懷故人風前淚霑灑

君再江南游相見蕪城曲埭舍支繩牀燂湯煖君足把示冰雪

文如嚼梅花讀岱華連厖屨江河互滄溟嗟哉勒銘手不救溝

壑辱栖栖齊魯閒妻子一茅屋誰知舊史官形影自寒燠

憶昔淹京華寓扉接深巷三五素心人文字相跌宕身沒名不

稱舉酒紛惆悵落葉辭故條從風各趨向時命不可借誰能齊

得喪相逢誦清編死灰心復壯

鄉人尋康山傲岸亦千古可能彈琵琶坎坎擊腰鼓榮名艸頭

露貴賤同一腐當時王鉤斜美人各黃土頽哉老翰林醉眼看

歌舞感觸不自知當筵淚成雨可憐謫僊人猶咏襄陽估

紙窗竹屋中同君語深夜暖客貂鼠裘誰能向身卸萬卷敵百
城恐遭達官罵雲霄旣已辭塵土安得謝不如飲濁醪起舞三
尺蔗傷哉故將軍銜淚渡清灞無家不可歸鄉心連太華
舊雨散如煙黯然不能數吳彭與二李各自成甘苦焦先困蓬
蒿永別頓千古眼前三同甲鼎列居公府鹽鐵稱美官關樞仕
亦無詹事持文衡森嚴士規矩執掌皆勞勞朝夕難共處不如
退院僧餅鉢相媚嫵大千一微塵慎勿嗟虎鼠
竹西舉離尊魯三僧此別隋堤柳盡枯奚忍爲君折雲龍莫相
從烏鼠難共穴游子戀老親前路正風雪寓公君已然泛宅我
猶屑豈無用世心不免生計拙黃河冰稜稜人迹互明滅送窮
除不祥歸家買桃茱

除夕二首

歲鼓通城爆竹紅鏗兩岸酒樓升
六年前此夕有人同泊揚州
四代人連簪黻一堂花擁笙歌且
飲團樂歲酒不須佩玉鳴珂

忠雅堂文集卷二十